



Sabtu, 16 Nopember 2024

Ogen: Matius 7:12



Mpelebei Perbahanen Si Mehuli



Tanggal 16 Nopember isepakati jadi hari toleransi Internasional (*International day for Tolerance*). I bas wari e kesempatan man banta ngergaken teman-temananta manusia i doni enda. Toleransi e ertina, teraloken kita kalak si la seri ras kita subuk suku, agama, bahasa, ras negarana. Ngergai budaya-budaya si lit, ras rusaha tetap ngaloken budaya si la seri ras budayanta. Toleransi e pe mereken ruang ras pendapat sada ras sidebanna.

Bahanlah man kalak sideban bagi ngena atendu ibahanna man bandu. I bas Pustaka, enda me ikatakaken toleransi. Leben kita erbahan mehuli man kalak sideban. I je lit makna, labo temanta saja ngenca si bahan mehuli, labo kade-kadeta saja entah jabunta saja. Kalak sideban e ngatakensa suku, bangsa, agama, budaya, bahasa si pelain-lain si la seri ras kita. E pe kerina temanta. Man kerina kalak e me si perlu si bahan mehuli.

Persinget enda situhuna isehken Jesus man ajar-ajar gelah la terjeng kalak Jahudi ngenca akapna temanna. Si labo kalak Jahudi pe teman ras perlu perbahanen si mehuli e ituduhkan man bana. Situhuna Jesus mbungkar pemahamen kalak Jahudi si megati kitik akapna kalak sideban, la teralokenna bangsa sideban, ras pengakapna si la sada agamana kafir. E nuduhkensa mis bahanna baleng-balengna. Lit ka pengangkanna maka kalak Jahudi ngenca bangsa Dibata, kalak sideban e kerina musuh Dibata. Pengangkan enda me si ipepinter Tuhan Jesus.

Adi kita mehuli ras ngergaken kalak sideban, la banci lang kita pe iergaken Jesus.

☞ Kualoken temanku uga litna